



TAJUK KHUTBAH JUMAAT

Siri: 10 /2024

PERSEDIAAN MENYAMBUT RAMADHAN

8 Mac 2024

Bersamaan

27 Syaaban 1445

DIKELUARKAN OLEH:

**JABATAN HAL EHWAL AGAMA
TERENGGANU**

PERINGATAN:

Adalah diingatkan bahawa sebarang penambahan dan pemindaan terhadap isi kandungan teks khutbah yang telah disediakan oleh Jabatan Hal Ehwal Agama Terengganu adalah **DILARANG**.

Khatib yang bertugas hendaklah menyemak kembali **RUKUN, AYAT AL-QURAN** dan helaian muka surat yang diterima. Pastikan teks dibaca terlebih dahulu sebelum menyampaikan khutbah.

KHUTBAH PERTAMA

الْحَمْدُ لِلَّهِ رَبِّ الْعَالَمِينَ. وَأَشْهَدُ أَنْ لَا إِلَهَ إِلَّا اللَّهُ الْمَلِكُ الْحَقُّ الْمُبِينُ،
وَأَشْهَدُ أَنَّ مُحَمَّدًا رَسُولُ اللَّهِ صَادِقُ الْوَعْدِ الْأَمِينُ.

اللَّهُمَّ صَلِّ وَسَلِّمْ عَلَى سَيِّدِنَا مُحَمَّدٍ أَشْرَفِ الْأَنْبِيَاءِ وَالْمُرْسَلِينَ،
وَعَلَى آلِهِ وَأَصْحَابِهِ وَمَنْ تَبِعَهُمْ بِإِحْسَانٍ إِلَى يَوْمِ الدِّينِ.

أَمَّا بَعْدُ، فَيَا أَيُّهَا الَّذِينَ آمَنُوا اتَّقُوا اللَّهَ وَكُونُوا مَعَ الصَّادِقِينَ.

Sidang Jumaat yang dirahmati Allah,

Saya berpesan kepada diri saya dan sidang jumaat, untuk bertaqwa kepada Allah dengan sebenar-benar taqwa, menjauhi segala larangan Allah dan melaksanakan segala titah perintah Allah. Semoga kita semua menemuiNya dalam taqwa dan suci dari segala dosa.

Mimbar Jumaat pada hari ini akan membicarakan khutbah yang bertajuk;

PERSEDIAAN MENYAMBUT RAMADAN

Sidang Jumaat yang dikasihi sekalian,

Marilah kita memanjatkan kesyukuran kepada Allah SWT kerana kita diberi kesempatan untuk berada di bulan Sya'ban dan mendoakan agar kita semua sempat mengecapi kemuliaan bulan Ramadan 1445H yang bakal menjelma. Ketibaan bulan Sya'ban, merupakan gerbang untuk kita memasuki bulan Ramadan. Sewajarnya bulan ini dijadikan tempoh untuk mempersiapkan diri agar kita dapat menghadapi bulan Ramadan dengan sempurna. Ketahuilah bahawa, kesempurnaan ibadat merupakan tanda pengabdian kepada Allah

SWT dan menzahirkan keikhlasan dalam melaksanakan ibadat kepadaNya. Sesungguhnya kejadian kita di atas bumi Allah SWT adalah untuk beribadat dan sujud patuh kepada segala suruhanNya. Firman Allah SWT dalam Surah al-Zariyat ayat 56:

وَمَا خَلَقْتُ الْجِنَّ وَالْإِنْسَ إِلَّا لِيَعْبُدُونِ ﴿٥٦﴾

Maksudnya: Dan (ingatlah) Aku tidak menciptakan jin dan manusia melainkan untuk mereka menyembah dan beribadat kepada-Ku.

Dalam bulan Sya'ban ini, ada segelintir daripada kita sibuk dengan persiapan menyambut Ramadan. Namun persiapan tersebut hanya berkisar tentang persiapan untuk membuka bazar Ramadan, merancang untuk berniaga walaupun tidak berniaga pada bulan yang lain, sibuk mencari bazar mana yang akan dikunjungi dan ada yang sudah bersedia dengan persiapan hari raya walaupun Ramadan belum menjelma lagi. Khatib tidak mengatakan perkara ini salah, namun hal ini sedikit sebanyak akan mengalihkan fokus kita kepada persiapan sebenar yang harus kita lakukan sebelum menghadapi ibadat puasa dalam bulan Ramadan.

Sidang Jumaat yang dimulihkan

Pada mimbar yang mulia ini, khatib ingin mengingatkan diri sendiri dan kita semua agar melakukan persiapan sebelum memasuki bulan Ramadan yang bakal tiba. Di sini khatib ingin berkongsi persiapan yang perlu kita lakukan iaitu;

Yang pertama; Secara umumnya, kita disunatkan berpuasa pada bulan Sya'ban terutama pada hari nisfu Sya'ban. Namun, bagi mereka yang tidak biasa untuk puasa sunat, maka tidak diharuskan untuk berpuasa bermula 16

Sya'ban. Keutamaan berpuasa sunat Sya'ban diceritakan oleh Sayyidatina 'Aisyah R.A (yang bermaksud):

"Aku tidak melihat Rasulullah S.A.W menyempurnakan puasa sebulan penuh melainkan bulan Ramadan dan Aku tidak melihat baginda berpuasa lebih banyak daripada bulan Sya'ban."

(Hadis Riwayat al-Bukhari dan Muslim)

Yang kedua; Segera menggantikan puasa bagi mereka yang meninggalkan puasa pada tahun lepas. Sebagaimana kewajiban solat lima waktu, puasa Ramadan juga wajib dilunaskan. Malah, hukum sama turut terpakai kepada muslim mukallaf yang meninggalkan puasa Ramadan disebabkan perkara tertentu yang dibenarkan oleh syarak, seperti keuzuran, sakit kritikal, bermusafir dan wanita mengandung atau menyusukan bayi. Jika mengabaikan kewajiban untuk menggantikan puasa hingga tibanya Ramadan nanti, tindakan tersebut dianggap sebagai berdosa dan wajib membayar fidyah. Fidyah wajib dibayar mengikut bilangan hari puasa yang ditinggalkan dan tidak diganti, iaitu dengan kadar harga secupak beras sehari. Kadar ini akan berganda dengan bertambahnya bilangan tahun.

Fidyah boleh ditunaikan melalui Majlis Agama Islam dan Adat Melayu Terengganu (MAIDAM). Gesaan untuk menggantikan puasa dan membayar fidyah ini dijelaskan Allah dalam Surah al-Baqarah ayat 184:

فَمَنْ كَانَ مِنْكُمْ مَّرِيضًا أَوْ عَلَىٰ سَفَرٍ فَعِدَّةٌ مِّنْ أَيَّامٍ أُخَرَ

وَعَلَى الَّذِينَ يُطِيقُونَهُ فِدْيَةٌ طَعَامُ مَسْكِينٍ

Maksudnya: (Puasa yang diwajibkan itu ialah beberapa hari yang tertentu; makasesiapa di antarakamu yang sakit, atau dalam musafir, (bolehlah ia berbuka), kemudian wajiblah ia berpuasa sebanyak (hari yang dibuka) itu

pada hari-hari yang lain; dan wajib atas orang-orang yang tidak terdaya berpuasa (kerana tua dan sebagainya) membayar fidyah iaitu member makan orang miskin.

Yang ketiga; Mengulangkaji hukum-hukum berkaitan ibadah puasa dan amal kebajikan yang lain. Memandangkan Ramadan hanya datang sekali setiap tahun, maka sayugialah dinasihatkan untuk menelaah kembali hukum-hukum berkaitan ibadah puasa. Ulangkajilah semula rukun puasa, syarat wajib puasa, syarat sah, perkara yang membatalkan, perkara yang makruh dan sunat ketika berpuasa. Ketahuilah juga bahawa Imam al-Ghazali membahagikan darjat puasa ini kepada tiga bahagian iaitu; Puasa umum iaitu hanya menahan perut dan syahwatnya daripada tuntutan nafsunya sahaja. Puasa khusus pula ialah bagi golongan para solihin. Mereka yang berada pada darjat kedua ini akan menjaga pendengaran, penglihatan, percakapan serta seluruh panca inderanya daripada melakukan kemaksiatan dan dosa. Manakala tingkatan puasa tertinggi ialah Puasa khusus al-khusus iaitu puasa yang menjaga hatinya daripada mengingati hal keduniaan. Dan menumpukan sepenuh hatinya hanya kepada Allah SWT dan hari akhirat serta memikirkan dunia hanya untuk tuntutan agama sahaja. Puasa ini merupakan puasa para anbia', siddiqin dan muqarrabin.

Sidang Jumaat yang dirahmati Allah

Bersempena cuti sekolah, di samping kita melakukan aktiviti bersama ahli keluarga, janganlah kita lalai akan kehadiran bulan Sya'ban yang kita lalui sekarang. Nabi SAW memperingatkan kita akan perkara ini, menerusi sabda Baginda yang bermaksud ;

“Bulan Sya’ban itu ialah bulan yang ramai manusia lalai tentangnya antara bulan Rejab dan Ramadan. Pada bulan Sya’ban diangkat amalannya kepada Allah dan aku ingin amalanku diangkat dalam keadaan aku berpuasa.”

(Hadis Riwayat Ahmad dan an-Nasaie)

Justeru, pada waktu yang berbaki ini, marilah kita melakukan persiapan dengan menelaah kembali hukum berkaitan puasa di bulan Ramadan. Kita juga seharusnya merancang aktiviti ibadah dan amalannya yang bakal kita lakukan dalam bulan Ramadan kerana bulan ini adalah bulan yang dinantikan oleh Nabi SAW, sahabat dan ahli ibadah.

Kita juga disarankan untuk berdoa agar kita dikurniakan keberkatan agar kita mampu untuk menempuhi Ramadan dengan ibadah yang sempurna;

اللَّهُمَّ بَارِكْ لَنَا فِي رَجَبٍ وَشَعْبَانَ، وَبَلِّغْنَا رَمَضَانَ

Maksudnya: Ya Allah berkatilah bagi kami pada bulan Rejab dan Sya’ban serta pertemukanlah kami dengan bulan Ramadan.

أَعُوذُ بِاللَّهِ مِنَ الشَّيْطَانِ الرَّجِيمِ

يَا أَيُّهَا الَّذِينَ ءَامَنُوا كُتِبَ عَلَيْكُمُ الصِّيَامُ كَمَا كُتِبَ عَلَى

الَّذِينَ مِن قَبْلِكُمْ لَعَلَّكُمْ تَتَّقُونَ ﴿١٨٣﴾

Maksudnya: Wahai orang-orang yang beriman! Kamu diwajibkan berpuasa sebagaimana diwajibkan ke atas orang-orang yang dahulu daripada kamu, supaya kamu bertaqwa.

(Surah al-Baqarah : 183)

بَارِكْ اللَّهُ لِي وَلَكُمْ بِالْقُرْآنِ الْعَظِيمِ.
وَنَفَعَنِي وَإِيَّاكُمْ بِمَا فِيهِ مِنَ الْآيَاتِ وَالذِّكْرِ الْحَكِيمِ.
وَتَقَبَّلَ مِنِّي وَمِنْكُمْ تِلَاوَتَهُ إِنَّهُ هُوَ السَّمِيعُ الْعَلِيمُ.
أَقُولُ قَوْلِي هَذَا وَأَسْتَغْفِرُ اللَّهَ الْعَظِيمَ لِي وَلَكُمْ وَلِسَائِرِ الْمُسْلِمِينَ
وَالْمُسْلِمَاتِ وَالْمُؤْمِنِينَ وَالْمُؤْمِنَاتِ فَاسْتَغْفِرُوهُ إِنَّهُ هُوَ الْغَفُورُ الرَّحِيمُ.

KHUTBAH KEDUA

الْحَمْدُ لِلَّهِ رَبِّ الْعَالَمِينَ.

وَأَشْهَدُ أَنْ لَا إِلَهَ إِلَّا اللَّهُ وَحْدَهُ لَا شَرِيكَ لَهُ،

وَأَشْهَدُ أَنَّ سَيِّدَنَا مُحَمَّدًا عَبْدُهُ وَرَسُولُهُ.

اللَّهُمَّ صَلِّ وَسَلِّمْ وَبَارِكْ عَلَى سَيِّدِنَا مُحَمَّدٍ، وَعَلَى آلِهِ وَأَصْحَابِهِ أَجْمَعِينَ.

أَمَّا بَعْدُ، فَيَا عِبَادَ اللَّهِ! اتَّقُوا اللَّهَ فَقَدْ فَازَ الْمُتَّقُونَ.

Muslimin yang dirahmati Allah,

Khatib menyeru kepada sidang jumaat sekalian, marilah sama-sama kita imarahkan masjid ini dengan menunaikan solat berjemaah. Sesungguhnya solat berjemaah mempunyai banyak fadhilat dan hikmahnya.

Justeru, janganlah tuan-tuan menanggung-nanggungkan untuk datang ke masjid. Bawalah anak-anak kita, ajaklah jiran tetangga dan ahli qaryah kita untuk sama-sama mengimarahkan masjid ini. Mudah-mudahan usaha kita ini mendapat rahmat, keampunan dan keredhaan daripada Allah di dunia dan akhirat.

Marilah juga kita memperbanyakkan ucapan selawat dan salam kepada Rasulullah SAW sebagaimana firman Allah dalam surah al-Ahzab ayat 56:

إِنَّ اللَّهَ وَمَلَائِكَتَهُ يُصَلُّونَ عَلَى النَّبِيِّ يَا أَيُّهَا الَّذِينَ ءَامَنُوا صَلُّوا عَلَيْهِ وَسَلِّمُوا تَسْلِيمًا ﴿٥٦﴾

اللَّهُمَّ صَلِّ عَلَى سَيِّدِنَا مُحَمَّدٍ، وَعَلَى آلِ سَيِّدِنَا مُحَمَّدٍ، كَمَا صَلَّيْتَ عَلَى سَيِّدِنَا
إِبْرَاهِيمَ، وَعَلَى آلِ سَيِّدِنَا إِبْرَاهِيمَ، وَبَارِكْ عَلَى سَيِّدِنَا مُحَمَّدٍ، وَعَلَى آلِ سَيِّدِنَا
مُحَمَّدٍ، كَمَا بَارَكْتَ عَلَى سَيِّدِنَا إِبْرَاهِيمَ، وَعَلَى آلِ سَيِّدِنَا إِبْرَاهِيمَ فِي الْعَالَمِينَ،
إِنَّكَ حَمِيدٌ مُجِيدٌ.

اللَّهُمَّ اغْفِرْ لِلْمُؤْمِنِينَ وَالْمُؤْمِنَاتِ، وَالْمُسْلِمِينَ وَالْمُسْلِمَاتِ، الْأَحْيَاءِ مِنْهُمْ
وَالْأَمْوَاتِ، إِنَّكَ سَمِيعٌ قَرِيبٌ مُجِيبُ الدَّعَوَاتِ.

اللَّهُمَّ ادْفَعْ عَنَّا الْبَلَاءَ وَالْوَبَاءَ وَالْفَحْشَاءَ مَا لَا يَصْرِفُهُ غَيْرُكَ.

اللَّهُمَّ إِنَّا نَعُودُ بِكَ مِنَ الْبَرَصِ وَالْجُنُونِ وَالْجُدَامِ وَمِنَ السَّيِّئِ الْأَسْقَامِ. اللَّهُمَّ
اشْفِ مَرَضَانَا وَارْحَمْ مَوْتَانَا، وَالطُّفْ بِنَا فِيمَا نَزَلَ بِنَا.

اللَّهُمَّ احْفَظْ مَوْلَانَا الْوَاتِقَ بِاللَّهِ السُّلْطَانَ مِيزَانَ زَيْنِ الْعَابِدِينَ، ابْنَ الْمَرْحُومِ
السُّلْطَانِ مُحَمَّدِ الْمُكْتَفِيِّ بِاللَّهِ شَاهٍ، وَأَنْزِلِ الرَّحْمَةَ عَلَيْهِ وَعَلَى السُّلْطَانَةِ نُورِ
زَاهِرَةَ، سُلْطَانَةِ تَرَغْكَانُو.

وَاحْفَظْ أَوْلَادَهُ وَأَهْلَهُ وَرِعَايَاهُ مِنَ الْمُسْلِمِينَ وَالْمُسْلِمَاتِ فِي الدُّنْيَا وَالْآخِرَةِ،
بِرَحْمَتِكَ يَا أَرْحَمَ الرَّاحِمِينَ.

اللَّهُمَّ احْفَظْ وِلْيَ الْعَهْدِ تَعَكُّو مُحَمَّدَ إِسْمَاعِيلَ ابْنَ الْوَاتِقِ بِاللَّهِ السُّلْطَانَ مِيزَانَ
زَيْنِ الْعَابِدِينَ.

اللَّهُمَّ أَعِزَّ الْإِسْلَامَ وَالْمُسْلِمِينَ، وَأَذِلَّ الْمُعْتَدِينَ الظَّالِمِينَ، وَدَمِّرْ أَعْدَائِكَ
أَعْدَاءَ الدِّينِ، وَانصُرْنَا عَلَيْهِمْ يَا رَبَّ الْعَالَمِينَ. اللَّهُمَّ انصُرْ إِخْوَانَنَا الْمُسْلِمِينَ
وَالْمُجَاهِدِينَ فِي فَلَسْطِينَ وَفِي كُلِّ مَكَانٍ.

Ya Allah,

Kami memohon hidayah dan petunjuk ke jalan kebenaran. Tetapkanlah iman kami di dalam agama-Mu. Basahilah lidah kami dengan bacaan al-Quran dan zikir kepada-Mu. Jadikanlah akhlak junjungan besar Nabi Muhammad SAW sebagai ikutan kami. Pereratkanlah hubungan sesama kami, saling bekerjasama dan bantu membantu dalam kebajikan dan taqwa.

Ya Allah

Jadikanlah negeri ini negeri yang aman, maju lagi diberkati. Bukakanlah pintu-pintu rezeki dari segala penjuru. Kurniakanlah kepada kami nikmat kesejahteraan yang berterusan. Jauhkanlah negeri kami ini daripada segala malapetaka, musibah dan apa jua kemurkaan-Mu.

Ya Allah,

Anugerahkan pertolongan dan bantuanMu untuk saudara kami di Palestin. Berikanlah ketabahan dan kekuatan kepada mereka dalam menghadapi kekejaman rejim zionis. Peliharakanlah bumi Baitul Maqdis dan seluruh saudara kami di sana.

آمين يا الله، يا رب العالمين

رَبَّنَا آتِنَا فِي الدُّنْيَا حَسَنَةً وَفِي الآخِرَةِ حَسَنَةً وَقِنَا عَذَابَ النَّارِ .
وَصَلَّى اللهُ عَلَى سَيِّدِنَا مُحَمَّدٍ وَعَلَى آلِهِ وَصَحْبِهِ وَسَلَّمَ .
وَالْحَمْدُ لِلَّهِ رَبِّ الْعَالَمِينَ .

عِبَادَ اللهِ!

إِنَّ اللَّهَ يَأْمُرُ بِالْعَدْلِ وَالْإِحْسَانِ وَإِيتَايِ ذِي الْقُرْبَى وَيَنْهَى عَنِ الْفَحْشَاءِ
وَالْمُنْكَرِ وَالْبَغْيِ يَعِظُكُمْ لَعَلَّكُمْ تَذَكَّرُونَ
فَاذْكُرُوا اللَّهَ الْعَظِيمَ يَذُكُرْكُمْ، وَاشْكُرُوا لَهُ عَلَى نِعْمِهِ يَزِدْكُمْ،
وَلَذِكُرِ اللَّهُ أَكْبَرُ، وَاللَّهُ يَعْلَمُ مَا تَصْنَعُونَ .
قُومُوا إِلَى صَلَاتِكُمْ، يَرْحَمْكُمْ اللهُ .